



QVÆSTIO MEDICA

Quodlibetariis disputationibus manè discutienda in Scholis
Medicorum die Iovis 25. Februarij.

M. JOSEPHO THOMASSEAU, Doctore Medico, Præside.

Esne uterus pars ad vitam necessaria?

I.

FOECONDA providæ Naturæ vis, ut se prodit singulari nutritionis industriâ, sic mirabili generationis nitet solertiâ: ex ingenioso instrumentorum apparatu, quorum ope utrumque suscipit opus, & susceptum perficit, ambigitur an, ut tot artium perita, sic rationis capax? Ex modo, quo alimenta in ventriculo coigit, arida humidis, levia gravibus confundit, comminuit, & in æquabilem convertit substantiam vitæ sustinendæ necessariam, convellitur oculati quantumvis ratio. Ex normâ, quâ utriusque sexûs semina in utero concipit, partes calidiores, spiritûsque magis participes terrenis crassioribusve circumjectis obvallatas, intrò & in medium secernit, & ex tam dissonis particulis adeò consonam effingit molem vitæ mox futuræ accommodatam? Quis operantem Naturam studiosus intruere non cupit, ne dum tanti opificij autorem æmulus imitari? Has quidem functiones tam bellè peractas sagaci Naturæ Parentis ingenio dignas qui prior censuit, hæreditario quasi nomine à Naturâ deprompto appellari sânxit naturales. Vitales, & animales de generes, aut minori artificio exerceri ne credas, imò perspicuitatis unius duntaxat gratiâ, aliâ nomenclaturâ insigniri distinguive scias. Mutuis harum functionum suppetiis ita regitur corporis œconomia, ut ad illius incolumitatem una sit omnium conspiratio, parque necessitas. At partium trino huic operi inservientium eò major est

2

nobilitas, quò major utilitas; aliæ ad vivendum ut sunt omnino necessariæ; aliæ ad bene vivendum sunt tantum requisitæ.

II.

TANTUS est inter partes consensus, ut si quid de alterâ vicissim in alteram transferatur, nihil impeditius ad ipsarum utilitatem, nihil deformius ad aspectum videri possit. Qui studiosæ mentis accuratâ sollicitudine illarum situm & figuram perlustravit; eademque animi contentione ad omnium usus, & consensus investigationem se accinxit, ipsarum nihil à sapienti Opifice, aut temerè conditum, aut superflue adjectum pronunciabit. Imperitum puta, vel impium reputa qui tam ardui pertæsus laboris, dissitam ne dum assequutus metam, naturalem tamen quarundam partium sedem, tum invertere, tum præscribere concinniores impudenter ausus fuerit, necnon excindere numerum otiosarum excedentem. Discordem partium concordiam Sapientem decet mirari, quemvis dedecet aspernari. Propriâ instrumenti cujusque functione perspectâ, quid conferant partes, nullo negotio deprehendi poterit. Tamen si peculiarem sibi actionem singulæ obtineant, hanc tamen ad communem referunt commoditatem, & usum totius, cujus gratiâ aut redditur actio concinna, aut viget integra, aut conservatur illæsa. Aliarum defectu symmetria deficit, an vita vegetior sit? Aliarum mutilationi succedit tum vitiata proportio, tum cæterarum languor, & confusio. Principum læsionem certa sequitur perniciēs totius reipublicæ suis fulturis destitutæ.

III.

QUÆ majori artificio elaboravit organa, aut quæ præstantiori destinavit officio structuras, & sedes animalibus in diversis minis diversas obtinere congruum duxit natura, quorum major varietas sæpè minoris est utilitatis index. Matrix quid varium & mutabile semper, ne dum similem teneat in variis speciebus tenorem, in mulieribus refert disparem, aut ætatibus distinctum, aut conditionibus dissimilem. In virginibus ejus cervicem plerique tradunt medio progressu dirimi exili membranâ venulis conspersâ, quæ pendet *ut pueri* & *ut pueri*, sed rarò reperitur in usu. In brutis sæpè multiplicem, in Hominibus semper unicam sortita est cavitatem, satis lenem, aut lubricam, nisi venarum, aut arteriarum orificiis exasperatam. Binas partes prominentes, instar cornuum vituli nuper erumpentium pro-

fert, in belluis pluribus gignendis foetibus capaces, in hominibus nec ovis, ut insolenter prolatum est, nec ipsis continendis foetibus conformes. Figura illi rotunda, ad cervicem paulò longior, pyro majusculo similis, at minor in junioribus, in iis quæ gestant major. In coxarum capacitate sedet quasi in suburbio, inter duas corporis cloacas tertia. Remotior à viscere, cujus motu stat vita. Aliàs pluribus affectisset incommodis, quod nullis, aut paucis commodis juvat. Vasorum, quibus refertur, ope superfluum exonerat sanguinem singulis mensibus appellentem. Fœliciter cum his agitur, quibus paucum, fœliciùs, quibus nullum, deside vitâ, aut opiparâ modò non residuum; pejùs, quibus iteratum; pessimè, quibus fluore albo dilutum, aut intermissum.

I V.

V I X partium innotescit utilitas, quibus ignoratur actio, cujus causâ provido summi Opificis consilio peculiares singulæ formatæ sunt figuras, animi moribus ancillari proclives. Præviam auctoris cognitionem cujus instrumenti non probat structura futuris actionibus destinata? Oculos ad videndum fuisse constructos, qui non fateretur ex visu, lividæ mentis est, aut lusciosæ; pedes ad progrediendum constitutos, ex gressu qui non concludit, audit aut cultor stoliditatis, aut divinitatis irrisor. Conceptionis officinam, & nostræ propagationis organum rato fixoque naturæ decreto effectum fuisse uterum nemo nescit; At in amœnum suavioris voluptatis hortum, quis sibi non asciscit? Qui libidini suæ nimis obsecundant, cæteris partibus anteponendum putant, ipso corde præstantiorem: sed, ut speciei conservandæ plurimum prodest, ita vitæ individui aliquandò non parùm obest: nec hujus partium nobilium albo ascribitur, nec famulantium ministrarumve seriem absolute necessariam ingreditur. In dissitam & infimam ablegati regionem demonstrat sedes, vix utilem toti corpori functionem structura ipsius manifestat & compages, primariò generationis negotio comparata, secundariò extrudendæ sordis ministerio idonea, cujus quanta elicitur commoditas, tanta injicitur necessitas.

V.

Q U A S strictiori vitæ necessitati partes astringit nostri Opifex, bellè munito opportunoque situ coercitas prudens donavit, quo, ut nil securitati magis commodum, sic ipsarum commoditati

nihil magis securum est. Vitæ nobilioris hominum, belluarumque discriminis parens ratio Palladis arcem occupat, unâ cum subsidiariis famulisque sensibus. Spiritûs, ipsiusque vitæ domicilium peccatus instrumenta suppetias hujus impensiores ferentia comprehendit. Nutritias opes præparantia, tum excrementitias amandantia sordes organa regionis alvinæ secessus definit, & circumscribit. Tam arctæ necessitudinis legi partes cæteræ non parent, quæ aliàs concinnæ, aut commodæ proportionis forti respondent. Harum desiderio una duntaxat vitæ infelicitis annexa est conditio; post ipsam oculorum *αἰσθησις*, tantum infelicitioris; post aurium, linguæ, narium succisionem, aut brachiorum, crurumve amputationem, minus jucundæ. Qui testes primarios generationis autores nobiliores ipso corde censuit, & magis necessarios, cur eunuchos vivere nunquam inficiatus, uterum ejusdem functionis ministrum, sed sexcentarum ærumnarum autorem, vitâ superstite amputari posse non fatebitur; tot æquè nobilium partium, quæ impunè adimuntur, æqualis ratio probat: tot mulierum imperforatarum, quibus inutilis uterus feriat, verax historia suadet; subscriptentium *Æginetæ*, & *Ætjæ* autoritas vincit; vivacium mulierum, quibus insolenti prudentiâ amputatur, quotidiana experientia confirmat.

Ergo uterus non est pars ad vitam necessaria.

Domini Doctores disputaturi.

*Claudius Biendisant.
Dominicus de Farcy,
Henricus Mahieu.*

*Claudius Guerin.
Paulus Mattot,
Carolus le Long.*

*Claudius le Vasseur.
Martinus Akakia.
Nicolaus Richard.*

Proponebat Parisiis JACOBUS DES PREZ
Parisinus. A. R. S. H. MDCLXXVII.

P A R I S I I S,
Apud Franciscum Muguet, Regis & Illustrissimi Archiepiscopi
Parisiensis Typographum.